

Prome Minister Mike Eman

Funcion original di Watertoren a cambia, su balor historico ta biba pa semper


ORANJESTAD – Diabierna anochi tabatin entrega oficial di e proyecto di restauracion di Watertoren na San Nicolas. Presidente di Monumentenbureau Sra. Ivonne Webb a indica, e proyecto a keda cla prome cu tempo y bou di e presupuesto, ta tira bista riba henter e proyecto den con-hunto cu esun di Oranjestad cu a keda cla aña pasa. E trabounan pa rescata ambos edificio di e consecucionan di tempo y negligencia, ta forma parti di Plan BoBario caminda ta dunando atencion na e mehoracion den tur skina di e isla, den tur su aspecto, tanto di infraestructura, vivienda y edificio, como tambe convivencia social.

Den caso di e Watertorennan na Oranjestad y San Nicolas, e compania nacional di produccion y distribucion di awa potabel, WEB Aruba N.V., a hunga un rol masha importante como propietario. E compania a hereda e edificionan aki despues cu a pasa for di Landswatervoorzieningdienst (LWV) pa su identidad y structura actual. Na 1991 WEB Aruba N.V. a cuminsa haci trabounan di mantencion den centro di Oranjestad. Ademá di sanea tubonan grandi den cayanan di Playa, a saca for di servicio e tubonan cu tabata conecta e watertoren cu e red di distribucion di awa. Pa e tempo aki ya caba e tanki tabata bashi

y e watertoren no tabata den funcion.

Na 2003, 64 aña despues di nan construccion, WEB Aruba N.V. a traspasa e propiedadnan di Watertoren na Oranjestad y San Nicolas pa Fondo di Monumento pa e suma simbolico di 1 Florin. E tramite aki a keda haci door di notario mr. Faride Tjon Ajong den presencia di Director di WEB Aruba N.V., ing. Jossy Laclé y otro testigonan. Watertoren di San Nicolas a wordo saca for di servicio na final di e mesun aña. Prome cu esey, na 1997, a haci un traspaso economico cu a habri caminda pa Fondo Monumento por a cuminsa traha riba e plan pa restaura e edificionan pendiente pa e finalisa e aspecto huridico di e traspaso.

Obviamente e watertorennan no por a cumpli mas cu nan meta original di suministra awa pa e barrio di Oranjestad y San Nicolas. Esun na Playa, por ehempel, cu su capacidad di 375 meter cubico ta 30 bi-aha menos di loke e area tin mester y ta haya actualmente como suministro for di tanki riba Mond Fierno. Adicionalmente e presion di awa cu e watertoren por ofrece ta hopi abou. Sinembargo, no kier a kita balor di e hecho cu e watertorennan ta representa e inicio di distribucion di awa na Aruba den un manera profesional y moderno pa e



Prome Minister Mike Eman durante su discurso na ocasion di inauguracion di e Watertoren na San Nicolas.

tempo ey. Nan ta muestra palpabel di e historia, arkitektura y desaroyo economico di nos isla.

Nan conservacion ta nifica cu generacionnan actual y den futuro por siña y comprende historia y crecimiento di Aruba. Di awor padilanti e edificio di Watertoren na San Nicolas lo fungi como un museo pa e companianan di utilidad nacional por mustra bishitantenan local, turista y nos hobennan e historia y desaroyo di e servicionan basico riba nos isla. E proyecto aki ta forma parti di un lista largo andando na San Nicolas pa desaroya henter su infraestructura y rebiba e interaccion social, civico y comercial di e ciudad. Diabierna anochi por a sinti mey mey di e publico, e sentimento di orguyo y satisfaccion pa e bon trabou cu Gabinete Mike Eman ta haciendo. □